

## LA FILOLOGJCHE E JÈ SANE; A MANGJE E A BÊF...

Sâr pre Toni,

“ogni dî si fâs la lune e ogni dî si impare une”, al diseve puar gnô nono. Leint la "Patrie" n. 3 o ài imparât che la Filologjche a è “arteriosclerotiche” e ancje ch'al sarés ben “che le fasi curte”.

O scrupuli, cjâr pre Toni, che'l tû pinsîr nol rivi fin su le sgjave: la Filologjche a è nassude prime di nô e, soi sigûr, che ni jô j fasarai i funeraî, ni tu tu sarâs clamât a dâ 'l ueli sant.

La Filologjche par gracie di Diu e par ben volê dai umins a stâ ne vorone ben e par vie de grafie a e ferme a volê che il plui gran numar di furlans a scrivin la lôr lenghe e che ducj i furlans la lein.

E i scrupuli ancje che i lamuelâns a intindin scrivi indifilicil par restâ in cuatri a dividi onôr e... magari bês.

La sielte a è 'ne vore semplice: o de bande de academie o de bande de int.

La Filologjche di simpri a è de bande de int.

Mandi.

*Feo di Bean*

*O soi content di sintî a dî, di un che al é dentri, che la siore Filologjche a sta ben. Seben che a cjamine sui setante, e jé sane di casse, a mangje e a bêf.*

*Parâtri tocje dî ce ch'al è: e varà vude une vite navigade e cjacarade, ma no si e copade pal lavôr. Tant sot dal Duce che sot de Democrassie cristiane, tant in pâs che in vuere, jê no si è rote plui di tant. Soredut le à cjatade simpri pronte, a prefarense di cheâtris, puars.*

*Il to discors, Feo, al ûl jessi, come simpri, furbo, ma al è unevore ridutîf.*

*Cuanche jo, e no dome jo, o dîs che la Filologjche e fâs une pulitiche culturâl aromai condanade, nol è par cuistions di grafie. Che e jè une robe che e à la sô impuartance, ma no jè di sigûr la prime. La cuistion plui grivie e jè che la Filologjche, che si space come ent primarûl di culture furlane, e dà la idee di no jessisi ancjemò nacuarte che il so mont nol è plui. E se al è un merit no piçul tirâ dongje dutis lis testimoniancis di un passât e fissâlis cun religjon tun libri o tun litrat o tun museu, no si pò nancje insumiâsi che un popul al puedi vivi cul vuessam e cu la claparie. Biele la storie, ma dome se nus jude a fâ la nestre storie. In chest la Filologjche no jude.*

*Riguart 'e arteriosclerosi, jo no soi un miedi e salacôr o podares sbalgjâmi.*

*Par solit si cjale i efiets. E chi i efiets a son cence fin deludents. Parceche, chê siore cussì sane e fanine di millions de regjon e di âtris bandis, no jè stade buine di parturî une robe che j mertas l'agrât dai furlans come vore meretorie. Di foragjatôrs nond'â pierdût un, ma di ocasions buinis lis à pierdudis dutis. O ricuardi dôs, che o crôt ch'a setin avonde significativis.*

*La cuistion dal vocabolari, che o veis ingomeât anje i clas a fuarce di stampâ e di tornâ a stampâ chel benedet di Pirone. Ch'al è ben fat; ma nol è vuestri. Al à scugnût vignî fûr un Faggin, che, magari cun tune grafie che Diu nus vuardi, al à fate une vore fenomenâl e meretorie. Come, par chel talian-furlan, al lavore un Ricci e âtris di lôr. Ben, nomo? Il secont câs, stant che vuâtris o seis de religjon di "Diu-Patrie-Famee", e jè la Bibie. Se no volevis cjapâle come opare di religjon, o podevis cjapâle come opare di culture. Ancje li il lujar us à sejanpât sot i vôi. E alore?*

*Bastial, par un popul, butâ fûr libris di cjarte patinade, di alte specialisazion e di presit impussibil? Esal just spindi centenârs di millions ogni an cence rivâ a butâ fûr sussidis sistematicis pes scuelis o a dâ dongje amancul un gjornalut popolâr? Par no fevelâ de mafie ch'e regne li dentri, là che se no si é tal zîr no si esist.*

*An sares ancjemò tantis, ma il penç lu ai dit. O vores zontâ che il strolie o proverbi "ogni dî si fâs la lune e ogni dî si impare une" no lu à inventât to nôno, ma al reste vêr instes. E difat vuè o ài imparât che "la Filologjche a é simpri de bande de int". Biât om! Al devi jessi stât un om di dut rispiet. Pecjât che nol à vude masse furtune cu la dissendense.*

*Pre Antoni Beline – mai 1988*